

Ekwo
Mayịka
 Onye Mpfuchiru Chileke

¹ Ọwaa bụ ozi, Chipfu ziru Mayịka; onye shi ịe mkpụkpu Morẹshetu; teke Jiótamu bụ eze ndu Jiuda; yele teke Éhazu bụ eze, ndu Jiuda kwaphọ; wakwaphọ teke Hezekáya bụ eze, ịe Jiuda ono. Ọ kwa ọphulenyá, ọ phuru l'opfu ẹhu ndu mkpụkpu Samériya yee ndu mkpụkpu Jierúsalem.

² Unubẹ ndiphe;
 unu nụmakwa-o!
 Gẹ mgboko l'ophu ngabẹkwa
 nchị;
 mẹkpoo onyemonye,
 bu iya nụ!
 Gẹ Nnajluphu, bụ Chipfu
 gbẹkwa l'eze-ulo iya,
 dụ nsọ gbaa unu
 ekebe.

Ikpe, eekpe ndu Samériya
 yee ndu Jierúsalem

³ Sụ-a; lekwa! Chipfu shikwa
 l'ẹka o bu ebubu abya.
 Oo-bya bya azọo garamu
 garamu l'eli-úbvú
 l'eli-úbvú, nọgbaa l'eliphe.
⁴ Úbvú úbvú ono a-zashihu
 ịe mkpula ọkpa iya;
 nsụda nsụda

agbawashihuchaa
 agbawashihu
 g'ùnwù, e doberu lẹ
 mgboru ọku; gẹ mini,
 shi lẹ mgbaze asọshihu.

⁵ Iphemiphe-a bukota iphe, kparu iya nu bu atupya, oshilokpa Jiekopu tupyaru Chileke; mbu iphe-ẹji, ndu onu-ulo Izurelu meru. ?Bu onye be uta duru le Jiekopu tupyaru Chileke? ?Tobudu ndu mkpukpu Sameriya? ? Bu onye be uta duru le ndu Jiuda meru iphe-ẹji? ? Tobudu ndu mkpukpu Jierusalemu? ⁶ “Noo g'o gude mu je emee mkpukpu Sameriya ikpozu; eka aa-nodu akoje opfu-vayinu. Mkpuma igbulo iya be mu a-chiru ye le nsuda ono. Mu emee g'okpa-ulo iya zekposhihu gheru onu. ⁷ Iphe, bu ntekpe, ndu Sameriya doberu be ee-tsu yogiri yogiri. Iphemiphe, aapfuje phe l'ulo nshi be ee-tsukota oku. Teme mu abya emebyishikota iphemiphe, o kpuru akpukpu dobe agwa agwagwa. Noo kele iphe ono, onoduje anako ono bukota l'eka o shi bu l'ugwo, aapfuje unwanyi-ukpara. O bukwarupho g'aakpakaje ugwo, aapfuje unwanyi-ukpara bu g'aa-kpaka iya.”

Ara ekwa; waa agu aphu

⁸ Oo iphe ono meru g'o gude mu je ara ekwa chia mkpu. Mu a-gbaru okpa oto; gbaru ehuru oto. Mu akwa phuuphuu ge nkuta-oswa. Mu arakwapho aphu-aphu ge mgbashi-ujiku; ⁹ kele onya, aba mkpukpu Sameriya taa ladu alala; teme o baswewaru ndu Jiuda. O jerwuakwaru onu-abata, e shi ejepfu ndibe mu; mbu jerwuchaa Jierusalemu l'onwiya.

¹⁰ Unu te epfukwaru iya ndu mkpukpu Gatu! Ophu unu arakwa ekwa arara ophu! Unube ndu mkpukpu Betu-Ofura; unu gwophua onwunu l'urwuku! ¹¹ Unube

ndu bu lẹ mkpụkpu Shafiya; Unu gbaru ọto gude iphere je iphe, unu eje! Ndu ọphu bu lẹ mkpụkpu Zananu taa fụtakwa afuta. Ndu mkpụkpu Betu-Ezeli be aphu tsokwaru; noo kele iphe, shi gbobuta phe nu be a nafuakwaru. ¹² Mbụ lẹ meji atofukwa ndu bu lẹ mkpụkpu Marotu atofu eka ephe no ele enya iphe, du ree; kele ejo-iphe shiakwa Chipfu l'eka byarwuta onu-abata mkpụkpu Jierusalemu. ¹³ Unube ndu bu lẹ mkpụkpu Lakishi; unu kwakobe ugbo-inya unu k'ogu! O kwa unubedua vuru uzo gbube ishi iphe-eji; ndu nwada Zayonu tsoahaa eka unu; kele atupya, ndu Izurelu tupyaru mu bu ngu be o shi l'eka. ¹⁴ Oo ya bu g'i kwaru ivu-ulo nu ndu mkpụkpu Moreshetu-Gatu. Ndu mkpụkpu Akuzibu l'e-me ndu eze ndu Izurelu mkpurukpuru-enya.

¹⁵ Mu a-chita ndu a-bya emekpee unube ndu bu lẹ mkpụkpu Maresha. Ndu Izurelu ndu ọphu aakwabeje ubvu a-gbaru laa l'ogba Adulamu je ewohaa onwophe. ¹⁶ Unu kpushia ishi; ghebe ishi onu; nodu l'aphu unwegirima ono, du unu l'obu ono! Unu mee ishi g'ochaa unu swarishwari ge k'udele; kele ee-mechaa naa phe unu kpa phe lẹ ndu.

2

Iphe, Chileke abya ememe; yee ọphu nemadzu abya ememe

¹ Aphu a-tsokwaru ndu ono, achi idzu iphe, adudu ree; mbu ndu anoduje l'iphe-azee phe ari k'eme ejo-ememe. Nchi -bohuepho; ephe awata iya ememe; kele ike, ephe e-gude eme iya du phe l'eka. ² Ephe achabeje enya l'ali onye ozo; naa ya l'okpehu. Teke ephe chaberu enya l'ulo; ephe anakwaa ya pho l'ehuka. Ephe nodu

anatajẹ nemadzu unuphu ibe iya; mbu naa obutobu phe iphe, bu okiphe iya.

³ Noo g'o gude Chipfu su: "Lenu; mu achiru ndu ono idzu ejo-iphe. Ophu ephe a-dudu ike anahu ejo-iphe ono agbala. Unu te ejehakwa etse etsetse kele teke ono a-du ejo eji. ⁴ Le mboku ono be ndiphe a-nodu eme unu iphe-ochi. Ephe emee unu kwaphukwaphu aguru unu ebvu-aphu-a:

"E mebyishikotaakwaru anyi
rengurengu.

Okiphe ndibe mu be e woru
kee.

Chipfu nataru mu iya l'eka!
O woru ali anyi nuchaa ndu
amadu iya nu."

Ndu mpfuchiru, epfu iphe, Chileke epfuduru

⁵ Oo ya bu l'unu te enweedu me onye lanu, a-no-chi enya unu le ndzuko ke Chipfu; onye a-tu ido gude kee ali ono.

⁶ Ndu mpfuchiru phe asuje: "Unu ta asujeshi l'oo Chileke pfuru udu iphe ono, unu epfu ono. O to dukpoda iphe-iphere, byaru eme anyi." ⁷ Su-a; gube onu-ulo Jiekpu; ?l'aa-su le Unme Chipfu be ehu egu egu to? ?Oomeje egube iphe ono to? Opfu mu ?too mejeduru onye uzo iya pfuru nhamunha iphe, du ree to?

⁸ O gbẹ buru gẹ mboku abvuwaa abvubvu be ndibe mu wu-lihuru buru ndu ohogu mu. Unu yefuchaa phe akpawuru-uwe ndu eze, ephe yeru; mbu ndu tuzoshihuru ehu aghatakporo ge ndu shi ogu alwa. ⁹ Unu achifuje unwanyi ndibe mu g'ephe te ebuhẹ l'eguru ibe phe. Unu anaje unwu phe iphe, bu iphe, du ree, shi mu l'eka. ¹⁰ Unu gbalihu tugbua lufu; kele eka-a

ta abudu okpoku unu; kele e merwuwaru iya emerwu. E mebyishiwaru iya; k'ophu e tee mekwatabaedu iya.

¹¹ O -buru l'ọ duru onye tsoru aghaphe epfu mkpokoro opfu adzushi uka eye iya su le Chileke suru g'a nguje me-me mini yee me-me mbekee ngushi iya ike; noo egube ndu epfu iphe, du unu ree anuma bu onoya!

Ekwe nwanu wafuru nu ukwe ndzota

¹² “O to dukwa iphe, e-me ge mu ta atuko g'unu ha chikobe; unube oshilokpa Jiekpu! O to dukwa iphe, e-me ge mu ta achikobe unube nwanu wafuru nu l'onu-ulo Izurelu l'eka lanu! Mu a-chikota phe g'ephe nokobe l'eka lanu g'onye chiru aturu ye l'ulo aturu; g'onye doberu egu yee aturu l'eka o no ata nri. Ephe e-ji eka ono pyimu pyimu atu wowoowoo kele ephe a-pa igwerigwe. ¹³ Onye e-gbuharu phe uzo osa l'aburu onye e-vutaru phe uzo. Ephe e-chikaa onu-abata mkpukpu ono wughata wufu. Onye eze phe evuru phe uzo ghataada. Mbụ l'oo Chipfu a-buru phe ivuzo.”

3

Mba aabarụ ndu-ishi ephe le ndu mpfuchiru

¹ Noo ya bu; mu su: “Unu ngabe nchi; unube ndu bu ndu-ishi oshilokpa Jiekpu; mbu unube ndu bu ndu-ishi l'onu-ulo Izurelu. ?To gbaduru g'unu a-maru g'ekpeje ikpe, pfuru oto to? ² Mbụ unube ndu kpuru iphe, du ree ashi; bya eyee ejo-ememe obu; ndu anoduje aswa ndibe mu akpo; bya akpa phe anu l'okpu; ³ unube ndu ata anu ndibe mu; bya aswa phe akpo; bya etsu okpu phe yogiri yogiri; ndu ebushije anu phe seese g'anu, aabya eye l'ochi; mbu g'anu aabya ade l'ite?”

⁴ E -mechaa; ephe araku Chipfu; ọle o too yeduru phe ọnu. Teke ono be oo-woharu phe iphu iya. Ọ buru iphe, a-kpa iya nu bu l'ephe mewaru ejo-ememe.

⁵ Wakwa iphe, Chipfu epfu baa: “A -bya l'opfu ehu ke ndu mpfuchiru Chileke, bu ndu ono, edusweshi ndibe mu ono; mbu ndu abujeru: onye nuru phe nri; ephe agoru ehu-guu nu iya. Teke o dudu iphe, a nuru phe; ephe akwakobe etso onye obu ọgu. ⁶ Noo g'o gude nchi je l'ejipfu unu. Ọphulenyanya anahu unu; ọchii erikpute unu. Ike agba eja taa dudu unu. Mbu l'enyanwu a-nyihuru ndu mpfuchiru ono. Echi-eswe aburu phe tsukiribaa. ⁷ Ndu aphuje ọphulenyanya be iphere e-mechaa du. Ndu agba eja aburu ndu e kpuru iphu le ntụ. G'ephe ha e-mechaa tuko kpuchia eka l'iphu kele Chileke te eyejeeduru phe ọnu.”

⁸ Obenu le mbedua be ike jikporu mu ehu pyimu pyimu. Unme ke Chipfu jiru mu ehu; yee ekpe ikpe, pfuru oto; yee ike-okpu, mu e-gude karu os-hilokpa Jiekopu emeswe, o mesweru; mbu karu os-hilokpa Izurulu iphe-eji phe. ⁹ Unu numakwa iphe-a; unube ndu-ishi onu-ulo Jiekopu; mbu unube ndu bu onyibe l'onu-ulo Izurulu; ndu-ikpe, pfuru oto du ashị; teme ephe nodu emeje iphe, pfuru oto l'o gbee nggo; ¹⁰ ndu gude egbu ọchi gude kpua mkpukpu, no l'eli ubvu Zayonu; mbu gude eme ejo-iphe kpua mkpukpu Jierusalemu. ¹¹ Ndu-ishi phe bu a -nuada phe iphe-uhalazu teme ephe ekpee ikpe. Ndu-ishi-uke phe nodu ezije iphe me a -pfuada phe ugwo; teme ndu mpfuchiru phe nodu agbaje eja me a -nuada phe okpoga. Ọle ephe tukokwaru-a dakobe Chipfu epfu su: “Chipfu nokwa l'echilabo anyi; ophu o dukwa ejo-iphe, byaru adapfuta anyi.”

¹² Ọo ya bụ l'ọo unu kparụ iphe, ee-mechaa kọo úbvú Zayọnu kọfu g'aakọje opfu-a. Mkpụkpu Jierúsalemụ e-mechaa bụru ikpọzu. Eli úbvú ono, bụ ẹka eze-ulo Chileke dū ono; e-mechaa bụru ẹka ẹgbudu zechiru.

4

Ẹhu-guu ojejoje

(Azá 2:2-4)

¹ Sụ-a; o -rwua teke ikpazu
 bẹ ee-me g'eli úbvú ono,
 a kpuru eze-ulo Chileke
 ono nguru anguru;
 mee ya l'ọ bụru iya
 a-kachaa shii l'iphe,
 bụkpoo úbvú ọzo
 nọgbaa nū.

Mbụ l'ee-me iya g'ọ kakọta
 úbvú ọzo l'eli.

Noo teke ndiphe a-nọdu
 awụ awụ-pfu iya.

² Ikpoto ọha a-bya bya asụ:

“Unu bya g'anyi je l'eli
 úbvú kẹ Chipful

Unu g'anyi je l'ulo kẹ
 Chileke kẹ Jiékọpu.

Ọo ya e-zì anyi ụzo iya;
 k'ọphu anyi a-wata
 etso ụzo, ọ tọru.”

Noo kẹle ekemu e-shi l'úbvú
 Zayọnu futa;

mbụ l'opfu Chipfu e-shi lẹ
 mkpụkpu Jierúsalemụ.

³ Ọo ya e-doshi opfu,

dugbaaru ikpoto
nemadzū.

L'ọ bya edoshiaru ọha,
ike dugbaa, bugbaa
uzenya uzanya opfu,
duru phẹ nū.

Ẹphe e-woru ogu-echi
phẹ
kpukwaa l'ọ buri ọgu;
woru arwa phẹ kpua
l'ọ buri mma nshii,
e gude akocha iphe.

Ọ tọ duedu ọha,
a-patakwadu ogu-echi
ejepfu ọhozo ọgu;
ọphu ẹphe anwuedu
alwu ọgu ọzobaa.

⁴ Onyemonye a-nọduje
lẹ mkpula vayinu nkiya;
mẹkwapho lẹ mkpula oshi
figu nkiya;
ọphu ọ dudu onye byaru
eye phẹ ebvu;
kẹle ọ kwa Chipfu,
bụ Ọkalibe-Kakota-Ike
eepfu iya.

⁵ Ọhamoha ọzo g'ẹphe ha a-nọdukwaro ejegbaa
l'ọbvū; agwa nshi phẹ; obenu l'anyibedua bụ onye anyi
e-gude ẹpha iya eje bụ Chipfu, bụ Chileke anyi jasū
l'ojejeje.

Iphe, Chipfu chiru k'ememe

⁶ Wakwa iphe, Chipfu epfu baa: “O -rwua mbọku ono
bẹ mu a-chikobe ndu ẹniyeni; mu achikobe ndu a chifuru

l'alì phẹ; yẹe ndu mu meru; ephe je iphe-ẹhuka. ⁷ Ndu ẹniyeni bẹ mu e-me g'ephe bụru ndu waru nụ. Mu emee ndu a chifuru l'alì phẹ g'ephe bụru ọha, ike dụ. O bụru Chipfu a-buru eze phẹ l'eli úbvú Zayonu e -shi mbọku ono jasụ l'ojejoje.

⁸ “A -bya lẹ gube nwada Zayonu, bu ẹka a nọ eche ndu Ízurẹlu g'onye eche aturu-a; bya aburu ẹka ndu Ízurẹlu agbabajẹ je ezeeru ndzụ; ii-mechaa bụru ishi g'i shi bụru teke ndiche; mbụ l'aburu eze e-mechaa rwubebaa gube nwada Jierúsalemụ ọzobaa. ⁹ ?Bụ gụnu kparu iphe, ịira ẹkwa? ?Ti nwehẹdu onye eze tọo? Onye akpọ-ziru ngu ụzo; ?ọ lawaru l'iswi tọo? mbụkwanu meru g'o gude iphe-ẹhuka gudeshia ngu gẹ nwanyi, ime eme. ¹⁰ Gube nwada Zayonu; nọdunu chi gburugburu gẹ nwanyi, ime eme; kẹle nta-a bẹ ịbyakwa aha ọma mkpukpu-a je akwaa l'ọma ẹgu. Ii-je alì ndu Bábilonu. O bụru ẹka ono bẹ aa-nafuta ngu. Oo l'ẹka ono bẹ Chipfu a-gbata ngu l'ẹka ndu ọhogu ngu. ¹¹ Nta-a bẹ ikpoto ọha, dụ igwerigwe chikoberu onwophẹ bya etsoo ngu ọgu. Ephe nọdu epfu sụ: ‘G'a tūrwa ya! G'anyi chiru ẹnya yeru Zayonu!’ ¹² Obenu l'ephe ta amadu iphe, bu ọriri Chipfu. Iphe, ọ chiru idzu k'ememe te edoduru phẹ ẹnya; mbụ onye ono, chikoberu phẹ g'onye chikoberu balì eje echichi ono.

¹³ “Gbalihu chia balì; gube nwada Zayonu; kẹle mu e-me g'i fua mpu-ígwè. Ichirupfu-ọkpa ngu aburu onyirubvu. L'ì zọo ikpoto ọha tọlitoli. L'i woru urwu ono, ephe ritaru l'eregede ono woru ye Chipfu l'ẹka; mbụ woru ẹku phẹ ono nụ Nnajiuphu ono, nwe mgboko l'ophu.”

5

Ukwe k'onye e-shi lẹ Bẹtulehemu

bya aburu Ishi

¹ “Su-a; unu chikobe onwunu noo l'ophere l'ophere; unube mkpukpu ono, ikpoto nemadzu no ono; kele ndu ohogu unu no-pheakwaru unu anophe. Onye-ishi Izurelu be ephe e-chikwa mgboro l'asha ke kpoo.

² “Obenu le gubedua, bu Betulehemu, no l'onu-egu Ifurata; mbukpokwaa gi bu nwa mkpukpu, ha nwanshi l'ime mkpukpu no l'ipfu Jiuda l'ophu-a; bukwa l'ime ngu be onye a-buru ishi ndu Izurelu l'ophu e-mechaa shi futaru mu; mbu onye shiro teke ndiche noduhawaa; onye shi l'edenwede noduta ndzu.

³ “Oo ya bu le ndu Izurelu be aa-gwo be gbiriri jasuteke nwanyi ono, ime eme ono l'ezeda; teme unwanu iya ndu ophuu alwapfutafua ndu Izurelu. ⁴ Onye ono l'apfukporu buru onye eche aturu chee aturu iya ono. O buru Chipfu a-nu iya ike; bya aburu Chipfu, bu Chileke iya e-me g'a kwabe iya ubvu. Ephe ebukporu; o to dudu iphe, eme phe nu kele teke ono be udu iya e-jedzuru mgboko l'ophu. ⁵ O buru iya e-me ge nchi aduru phe doo.”

Ndzota yele Ola-l'iswi

“Teke ndu Asiriya l'a-bya awuba l'ali anyi; zohaa garamugaramu azopyashi eka anyi kpuru kpushia ya ike be anyi a-hota ndu eche aturu umadzu esaa ye ndu bu ndu-ishi umadzu esato g'ephe duta anyi tsoo ndu Asiriya ugu. ⁶ Ephe e-gude ugu-echi lwa ali ndu Asiriya ono; mbu l'ephe a-mi-lita ugu-echi phe gude lwa ali Nimurudu. O buru iya a-nafuta anyi l'eka ndu Asiriya; m'ephe -byaephe bya awuba l'ali anyi wata azo garamugaramu awu ala l'oke ali anyi ono.

⁷ “Oshilokpa Jiekopu ndu ophu waru nu l'a-nodu l'echilabo ohamoha du g'iji, shi l'eka Chipfu akwa. Ephe

a-dụ gẹ mini, lwaru yẹgẹyege dughbaa dzedzedze l'eli ẹswa, bu ọphu abudu nemadzu be o no ele ẹnya iya; ọphu o dudu onye o no ngaberu. ⁸ Oshilokpa Jiékọpu ndu ọphu waru nu l'a-nodu l'echilabo ndu-ohozo buru oduma, no l'echilabo anu-egbudu; mbu l'ephe a-dụ gẹ nwa oduma, ephe l'aturu gharu ẹghirigha, abujeru o - nodu eje l'olajashi iphe, o guderu; ọphu o dudu onye aduje ike dzoo iphe, dabaru iya l'eka. ⁹ Ndu ohogu ngu be ii-mekpekota; li chi-lia eka imeli tua okoo. Ozo bu le ndu gu l'ephe duru l'opfu be ee-mebyishikota.”

¹⁰ Wakwa iphe, Chipfu epfu baa: “O -rwua mboku ono be mu e-gbushi inya unu bya aku-pyashia ugbo-inya unu. ¹¹ Mu e-mebyishi mkpukpu, dughbaa l'ali unu bya etsukposhia ulo-mgbobuta unu g'o ha. ¹² Mu e-mebyishi k'eme mgbashi ono, unu eme ono; ọphu ndu jibya aduedu l'echilabo unu. ¹³ Mu e-mebyishi ntẹkpe ono, unu pyishiru agwa agwagwa ono; bya emebyishikwapho mkpuma mkpuma ono, unu agwa agwagwa, dughbaa l'echilabo unu ono; ọphu unu ephozebaeduru iphe, unu gude eka unu mee ozobaa. ¹⁴ Mu abya alwu nshi Ashera ono, no l'echilabo unu ono; woru mkpukpu unu l'ophu tsukposhia. ¹⁵ Mu egude oke ehu-eghu mu melata ohamoha ono, jikaru l'ephe tee medu iphe, mu suru g'ephe meje ono.”

6

Eku Ndu Izurelu Ikpe

¹ Unu ngabekwa nchi l'olu Chipfu.

Gẹ gube Chipfu gbeshi pfuru apfuru pfua iphe, e meru ngu l'iphu eze ubvu! G'ubvu ubvu numawaro iphe, oome g'o pfua! ² Unube ubvu ubvu; unu numakwa iphe, Chipfu abya edodo! Unu ngabe nchi numa iphe, ada nu; unube itso, gude mgboko jasuru asuru! Noo kele o duru iphe,

Chipfu epfu lẹ ndibe iya meru iya; mbụ l'ọ duru iphe, Ọogushi lẹ ndu Ízurẹlu meru iya.

Ọnu, Chipfu eye

³ “Sụ-a; ndibe mu; ?Bụnaa gụnu bẹ mu meru unu? ?Bụ ivu-erwa gụnu bẹ unu a-sụ lẹ mu boru unu? Unu sanaa mu iya! ⁴ Mu dufuwaru unu l'alị Ijiputu; bya agbafuta unu l'alị ono, unu shi nọdu bụru ohu ono. Mu zia Mosisu sụ g'Ọ bya edua unu; yefua Erọnu; yee Miriyamu. ⁵ Unubẹ ndibe mu; unu nyatakwa idzu, Ọ chiru; mbụ eze ndu Mówabu, bụ Belaku! Unu anyatakwapọ Ọnu, Belamu yeru; mbụ nwa Beyọ! Unu nyatakwa ije, unu jeru e -shi lẹ mkpụkpu Shitimu jasụ lẹ mkpụkpu Gilugalu; k'ọphu unu a-maru iphe, Chipfu meru gude dzọta unu!”

⁶ ?Bụ gụnu bẹ mu e-gude bya l'iphu Chipfu; mbụ bya ephozeru Chileke ono, parụ ẹka apaa ono? ?Bụ anụ bẹ mu e-wota bya l'atatiphu iya gẹ mu gude iya gweeru iya ngweja-akpọ-ọku; mbụ nweswi mgbapha? ⁷ ?Ọo-dụ Chipfu ree mẹ a -nụ iya unu-kuru-unu ebili; nụ iya nggele manụ, asọ gborogboro unubuku ugbo iri? ?Mu e-wota ọkpara mu gude gwaa Chileke gwefu atụpya, mu tūpyaru iya tọo; mbụ gẹ mu woru nwa, shi mu l'ẹhu pfaa ụgwo iphe-ẹji mu?

⁸ O goshiakwaru gube nemadzụ iphe, dū ree k'ememe. ?Bụkwanu gụnu bụ iphe, Chipfu ele ẹnya iya l'ẹka ngu, abụdu g'i meje umere, pfulu ọto; l'i yee ẹnya l'aphụ obu-imemini; l'i wozе onwongu alị; etso Chileke ngu.

Ikpe, nmaru ndu Ízurẹlu yee iphe, ee-me phe

⁹ Unu ngabekwa nchị! Ọ kwa Chipfu eku ndu bu lẹ mkpụkpu oku; tẹme atsụ gube Chipfu ebvu bukwanuru mmamiphe. “Unu nụmakwa iphe ẹchachi ada; yee olu onye echi iya nụ! ¹⁰ Unubẹ ndu ẹjo-iphe; ?bụ gẹ mu zọhaa ẹku ono, unu kparụ l'uzo ẹregede ono tọo; yee

nwamkpirikpu nkweka bu iphe, Chileke turu onu? ¹¹ ? Mu kpefu onye gude iphe, aatuje iphe l'uzo eregede ere aswa; mbu onye vu eda, erwa iphe, no iya nu abudu iphe, o suru l'o bu? ¹² Ndu nweru iphe, bu le mkpukpu ono emeje ndu ozo mkpawere. Ndu bu iya nu bu ndu ntuphu-ire; teme ephe ndu egudeje ire phe epfu opfu l'eregede. ¹³ Noo g'o gude mu watawaa emebyishi gube mkpukpu ono; mbu eme ge mu gwepyaanngu; kele iimeje iphe-aji. ¹⁴ Nri be ii-rikwa; ole ephe tee jidu ngu. I -richaa ephe egheluru ngu-a onu. I -kpachaa eku dobe; o to dudu ophu adu nu; kele ophu i doberu g'o phodu be bu ogu-echi be ee-gude l'wua ya. ¹⁵ Ii-kobekpoo iphe l'ali; ole i ti kpatadu iya. Akpuru oshi olivu be ii-zoshikwa; ole i ti nyidu manu iya. Ii-pyishikwapho akpuru-vayinu; ole i ti ngudu mee ya. ¹⁶ Kele unu mewaru iphe, Omuri suru g'unu meje; bya emekota iphemiphe, ndibe Ehabu anoduje eme; teme unu byakwapho etsoru omelali phe. Noo g'o gude mu je l'aha gube mkpukpu ono g'i buru ochobu; bya emee ndu bu ngu nu g'ephe buru ndu aachi ochi. O buru unu be ndiphe a-ndu ata uta."

7

Aphu ndu Izurelu

¹ O kwa aphu tsoru mu; kele mu du g'onye egu agu le teke a wochaaru akpuru oshi l'onanwu; bya awochakwapho akpuru vayinu. Ophu o duedu tiyotiyoo akpuru vayinu ono, dukwadu nu, aa-wota ria eriri. Ophu o dukwapho akpuru, dukwadu l'oshi figu, bu ophu agushikpoo mu ike. ² Su-a; ndu yeru Chileke obu laakwaru l'iswi l'eliphe-a. Mbu l'o to duedu g'o ka mma l'oo onye lanu, bu onye obu iya guru iphoró, phoduru nu. Onyemonye buephe iphe, o kwageberu akwagebe iya

bụ g'egburu ọchi. Onyenonu gude ụgbu-egege ege gẹ ya nmata nwune iya. ³ Eka phẹ ẹbo ẹbo bẹ eme ẹjọ-iphẹ kwọwaru ẹhu. Ndu bụ ọnyibe mẹ ndu-ikpe ekebeje g'a nū iphe-ụphalazu. Ndu bụ ọ-kari-ẹka nọdu anatajẹ iphe, gụru phẹ nū l'ọkpehu. G'ẹphe ha nọdu anọduje achị idzu lanū. ⁴ Onye gbẹ kachakpọo ree l'ime phẹ adzū g'obvu. Onye ọphu kachaa abū onye obu iya gūru ìphóró ka ikpo ọgara-mbo ẹji.

Eswe mbọku ono, ndu nche unu shi pfuta opfu iya ono rwuakwaru; mbū mbọku, Chileke a-nū unu aphū. Ọ kwa nta-a bụ teke aa-tū unu ẹberebete. ⁵ Unu ta adakobekwa nemadzū ibe unu! Ọphu unu achijekwaru ụpfu ye l'onye unu l'iya eshi ònyà! Mbụkponu nwanyị ono, zẹ tū-kobe ngu ishi ono; makwarū ụdu opfu, iipfu eyeru iya! ⁶ Noo kẹle nwa ta akwabẹjedu nna, nwūru iya nū ùbvù. Nwa nwanyị nọdu etsoje ne iya opfu. Nwa nwanyị, aalū alūlu nọdu etsoje ne ji iya opfu. Mbū lẹ ndu bụ ọgu dūru nemadzū bụ ndu ẹphe l'iya bu l'unuphu.

⁷ Obenu lẹ mbẹdua a-nọdunupho ele ẹnya Chipfu. Mu a-kwabẹru Chileke, bụ Onye ndzọta mu. Mbū lẹ Chileke mu a-nụma-a olu mu.

Ndu Ízurẹlu a-gbẹshia ọzo

⁸ Unubẹ ndu ọhogu mu; unu te etekwa ẹswa kpua mu! A makwarū-a lẹ mu daru iko; ọle mu a-gbalihukwaa ọzo. A makwarū-a lẹ mu nọ l'ọchii; obenu l'ọo Chipfu a-būru ìphóró, dūru mu nū. ⁹ Eshinu mu meru Chipfu iphe-ẹji bẹ mu e-vutanū oke ẹhu-eghu iya vuru; gbiriri jasū teke ọo-bya elee ẹnya l'opfu ẹhu mu; meeru mu iphe, rwuberu mu nū. L'ọ bya edufuta mu dobe l'ẹka ìphóró dū. Mu ahūma g'oo-gude dzọta mu. ¹⁰ Noo teke ọhogu mu ono a-hūmakwa iya phọ. L'o woru ẹka kpube l'iphu l'ẹka iphere e-gude iya. Mu egude ẹnya mu hūma ẹka ọoda

kpurumu kpurumu; mbu onye ono, shi asuje mu: “?Denu Chipfu, bu Chileke ngu?” O to dudu g'aa-n0-beru l'a zo0 yebedua tolitoli g'onye azoka epuchi oma gbororo.

¹¹ Eswe mboku, aa-kpukwa igbul0 ngu ono abyaakwaa. Mbu mboku, ee-me g'oke ali ngu kporiberu. ¹² O -rwua mboku ono be ndibe ngu e-shijechaa Asiriya abyapfuta ngu; mekpoo ndu e-shi l'iphe, bu mkpukpu, n0 l'ali Ijiputu; mbukpoo e-shi l'ali Ijiputu jas0 l'enyimu Yufurétisu; eshi l'eze-enyimu owa-a jas0 l'ozo; eshi l'úbvú owa-a jas0 l'úbvú ozo. ¹³ Eliphe l'ophu aburu ochobu; o buru ndu bu iya nu a-kpa iya; kele ephe a-ghota akpuru- iphe, ephe eme.

Epfu anu Chileke aja iya ajaja

¹⁴ Guden0 oshi-eree ngu chee ndibe ngu g'onye eche aturu; mbu ndu ono, bu okiphe ngu ono, bu ndu ophu bu nwekinyi phe l'ime oswa; l'ali, zeru eswa nri eghu yee aturu ono. G'ephe ndunu l'ali Beshanu yele ali Giladu je ataa nri g'o shi duhawaa teke ndiche ono.

¹⁵ “O kwa egube iphe, du biribiri, mu meru goshi teke ono, unu shi le Ijiputu futa ono bu ge mu e-me iya goshi phe nta-a!” ¹⁶ Ohamoha a-huma iya; iphere egude phe. L'a nashichaa phe ike phe l'ophu. Ephe eworu eka dee l'onu. Nchi echihu phe; ephe awata ada nkuchi. ¹⁷ Ephe egude ire richaahaa urwuku g'agwo; mbu g'unwu iphe, awu l'epho. Ephe eshigbaa l'eka ephe kpuru futa aphugbaa ke kweekweekwee. Ephe egude ndzu-agugu ghakobechaa byapfutashia Chipfu, bu Chileke anyi. Ephe awata unu atsu ebvu.

¹⁸ ?Bu onye du0baa ge gube Chileke, bu onye aguje nvu l'iphe-aji; teme i ndu eleghataje emeswe, nwa ndu ono, phoduru nu ono, mesweru ngu; mbu ndu ono buhukwapho okiphe ngu ono? Ehu te eghujedu ngu eghu

jasu l'ojejoje. Obenu l'iphe, aduje ngu ree bu gi phua obu-imemini. ¹⁹ Ii-phuru-a anyi obu-imemini ozo. Iphe-aji anyi be ii-mechaa zopyashia l'okpa. Mbu woru ejo-ememe, anyi emekota vuru je echie l'eze-enyimu. ²⁰ L'ii-meru oshilokpa Jiekopu ire-lanu; mbu phuru oshilokpa Ebirhamu obu-imemini, bu iya bu angu, i riru nna anyi oche phe teke ndiche ono.

Bayıburu Izii
Izii: Bayıburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30 Dec 2021

c6885c7c-c550-5b8b-a4fe-4bd714af4f6d